

40 aña di Robert Jeandor su proyeccion musical internacional

ORANJESTAD – Cuarenta aña pasa, un hoben musico di e barrio di Madiki a wordo yama for di un di e musiconan mas famoso y reconocí e tempo aya, Johnny Ventura, pa e bay Republica Dominicana y forma parti di un proyecto musical. Ta trata di e talentoso, carismatico y spiritual musico Arubiano, Robert Jeandor, cu dialuna awo, dia 19 di november pa 6:30pm na Cas di Cultura, lo tin un homenahe p’e, pa recorda su trayectoria musical internacional pa medio di un documental.

E evento aki lo ta uno masha special, ya cu tambe lo wordo recorda 34 aña di historia di e Festival Voz-i-Landia Escolar for di 1981 te 2015. E festival aki a bira un plataforma pa promove y descubri varios



talento musical di nos isla, yega di proyecta su mes internacionalmente. entre otro Edjean Semeleer y Czar Olarte, kende tambe a

E historia di e festival aki a keda condensa den un buki bon documenta, skirbi pa Jennifer (Jenni) Laclé-Boezem, cu lo ta disponibel durante e evento aki, y tambe na e boekhandelnan local y cerca e promotor cultural Mirto Laclé, kende ta Jenni su casa. Robert y su Solo Banda Show y tur e generacionnan di cantantenan descubri den Festival Voz-i-Landia Escolar lo t’ey pa deleita e publico presente.

Robert y su sueño

Robert a relata na Bon Dia Aruba e dia cu el a bira un musico internacional. E tempo aya, ya caba e tabata canta y toca localmente, un don cu el a yega di manifesta na edad tempran. Robert su tata tabata un tremendo guitarista y ya caba cu 6 aña el a cuminsa mishi cu e instrumento aki. E ta bin for di un famia musical, y Robert su prome presentacion den publico tabata ora cu e tabatin 9 aña. Un dia den temporada di Pasco na 1963, Robert su ruman mas grandi a bin busk’e pa forma parti di un grupo di gaita ‘Las Blancas Palomitas’, ya cu e tabata toca e cuatro Venezolano. Nan a bay toca na Centro di Bario Tanki Leendert, cu e tempo aya tabata un barak. Asina el a cuminsa desaroya su don y pasion pa musica tocando den diferente sitio. Te hasta el a yega di compañía algun agrupacion musical y artistanan di taya internacional cu a bin duna concierto na Aruba.

Na 1974, Robert a dicidi cu e lo dedica y biba absolutamente di musica. “Mi tabata asina solicita.” For di 1976 te

cu 1979, Robert a cuminsa toca cu e bandanan y musiconan cu tabata bin di afo, entre nan El Gran Combo, Dimension Latina, Johnny Ventura, Cuco Valoy, e pianista y compositor Dominicano, Rafael Solano.


Tambe pa e añanan ey, Robert a cuminsa sinti cu e kier cuminsa bula mas haltu. El a cuminsa sinti e gana di kier ta un musico grandi y logra un escenario internacional tambe. El a cuminsa subi e trapi di e otro musiconan famoso. E deseo aki tabata bira mas fuerte, ora cu Robert tabata mira tur e bandanan y cantante famoso, manera Fania All-Start, pero tambe Johnny Pacheco y otronan mas, via canal di television Venevision di Venezuela.

Entre maart y april 1978, e merengero Dominicano, Johnny Ventura, conoci como ‘El Caballo Mayor’ a bin Aruba; y Robert a toca hunto cun e na Club RCA. Johnny a puntr’e: “Kico bo ta haci akinan?” Y Robert a responde: “Mi ta traha den un hardware store.” Despues el a tende for di boca di Johnny Ventura e palabra magico tan spera: “Bo no por keda akinan, bo tin cu bay afo.”

Robert internacional

15 di januari di 1979 e dia tan spera pa Robert a yega. E musico Johnny Ventura a yama Robert pa bay Santo Domingo. E musico Ventura tabatin un banda musical cla pa Robert: Los Hijos del Rey.

Continuacion riba Pag.31



40 aña di Robert Jeandor su proyeccion musical internacional

Continuacion di Pag.2

Den e banda aki, e famoso musico Fernando Villalona y Raulin Rodriguez tabata canta Salsa. Pero nan a bandona e grupo, dunando espacio pa e yiu di tera por drenta na un agrupacion Dominicana. Na Republica Dominicana, nan por haya facil cantante di merengue; pero pa musica salsa tabata mas dificil.

Johnny su vision riba Robert su futuro musical no tabata cun e y tampoco cu e agrupacion Los Hijos del Rey, sino cu nada menos e agrupacion Gran Combo di Puerto Rico, considera como Universidad di Salsa. Den otro ocasion nan a yega bin Aruba, y Robert a logra canta cu nan. Robert ta considera su mes un Salsero for di mucha, tempo



cu e tabata scucha tur atardi danzones Cubano na Radio Kelkboom. Pero e ritmo di Tumba di Aruba y Corsou tambe a contagi'e.

Na principio, su adaptacion na Republica Dominicana no tabata facil, principalmente su Spaño no tabata manera



e mester ta. Pero el a adapta lihe, y te hasta el a cuminsa papia Spaño a la Dominicana. Un tema cu a bira un exito rotundo canta pa Robert na inicio di su carera musical internacional tabata: "Yo me Dominicalizo." E tema aki a cay bon pa Robert como Arubiano estableci na Repub-

lica Dominicana. Pero tabatin otro componente rond di e tema aki, e banda tabata Dominicana y e compositor di e tema tabata Portorriqueño. "Yo me Dominicalizo" a bira un hit y un clasico te awendia.

Temanan musical famoso

E musico Robert Jeandor ta un compositor y arreglista tambe. E tema musical cu el a compone basta aña pasa y cu ainda nan ta pidi'e pa e toke ta Bolobonchi. E ta haya cu e tumba aki a keda pa denter bida. Cada artista tin un tema cu ta identifik'e, por ehemplo Oscar de Leon ta conoci pa su tema 'Lloraras'. Tur hende ta identifica Robert cu Bolobonchi. E tema aki a bira un bendicion pa e musico Arubiano, kende a yega di bira

tres biaha Rey di Tumba. "Mi tin tanto tumba, pero toch esey nan kier pa mi canta," el a bisa. E tema aki a wordo graba pa e musico Colombiano Joy Arroyo tambe.

Sinembargo, si Robert ta bay Republica Dominicana, di biaha nan ta yam'e como 'el hombre de Pochula'. E tema di salsa aki a keda 7 luna riba hit parade na Santo Domingo. Den e documental cu lo wordo presenta dialuna awor, e experto di salsa mas grandi di Sto. Domingo, Eugenio Perez, a declara cu entre e 15 tema di Salsa mas grandi pa historia di Republica Dominicana, e tema Pochula ta number 3. Tur e exitonan ta di Dominicanonan, e unico stranhero inclui den e lista aki ta Robert Jeandor.

Awor Robert Jeandor ta biba un bida musical cu un compromiso spiritual dedica na Misa di Alto Vista. E ta bay tur mainta 5'or pa habri e kapel aki dedica na e Patrona di Aruba, y pa 6'or atardi e ta bay haci'e limpi y cer'e hunto cu otro grupo di persona. Jose Figueroa ta e cabesante di e grupo aki y Robert ta e di dos. Aunke Robert ta bisa cu nunca el a cana riba caminda robes, tampoco nunca el a uza droga, pero semper el a sinti e proteccion di Señor.

